

辨

證

錄

辨證錄卷之六

山陰陳士鐸敬之甫號遠公又號朱華子著述

會稽陶式玉尚白甫號存齋又號 叅訂

火熱症門

一陽明火起發狂腹滿不得臥面赤而熱妄見妄言人皆謂內熱之極也然而陽明屬土而不屬火何以火出於土謂是外邪之助乎既非暑氣之侵又非寒氣之變乃一旦火起以致發狂人多不解不知土中之火乃心中之火也心火起而陽明之火翕然而發陽明胃經乃多

氣多血之府火不發則已一發而反不可制往往捲土
而來火焰升騰其光燭天而旁且沿燒於四境有不盡
不已之勢非惟焚盡於胃而且上燒於心心君不寧且
有下堂而走者神既外越自然妄有所見既有妄見安
能止其妄言此讖語之所以生也然則陽明之火乃內
因而成非外邪所致也治法宜與傷寒之狂傷暑之狂
俱不可同日而論矣然而陽明之火其由來雖有內外
之殊而治陽明之火其方法實無彼此之異必須急滅
其火以救燎原之勢而不可因循觀望長其火焰之騰

以致延燒各臟腑也方用人參竹葉石膏湯治之人參
五錢石膏一兩麥冬一兩竹葉三百片知母三錢甘草
一錢糯米一撮水煎服一劑狂定再劑腹滿不能臥之
病除而妄見妄言之症亦去矣不必三劑此方退胃火
之神劑也凡有胃熱之病用之皆宜然止可救一時之
急而不可瀉長久之火論理內熱之火既起於心宜瀉
心而反瀉胃者恐胃火太盛必致變生不測也蓋心火
不止不過增胃火之炎而胃火不止實有犯心火之禍
所以治心火者必先瀉胃也胃既瀉矣而後減去石膏

知母加入黃連一錢玄參一兩再服二劑不特胃火全消而心火亦息也

此症用苦龍

湯亦神

地龍二十條搗爛苦參五錢水煎服之一劑卽止狂不必再服

一熱病有完穀不化奔迫直瀉者人以爲大腸之火也誰知是胃火太盛乎夫胃火上騰而不下降胡爲直下於大腸而作瀉耶蓋胃爲腎之關腎虛則胃之關門不守胃乃挾水穀之氣而下行矣第腎虛爲寒而胃何以反能熱耶不知腎虛者水虛也水虛則火無所制而命門

龍雷之火無可藏之地直冲於胃見胃火之盛亦共相附會不上騰而下泄矣胃火既盛又得龍雷之火則火勢更猛以龍雷之性甚急傳於大腸不及傳導故奔心而直泄也治法似宜先治腎矣然而胃火不瀉則腎火斷不肯回但遽瀉胃火則胃土因火而崩胃水隨土而洩又不能底止必須先健其土而分利其水則水清而土可健火可安而龍雷之火亦易於收藏也方用緩帝湯茯苓一兩芡實山藥各三兩車前子五錢薏仁一兩升草錢人參一兩五味子一錢此方無一味非健

上之藥又無一味非利水之品然利水之中不走其氣
下之藥又無一味非補腎之品無非補腎之味
以得補而真陰生龍雷之火自仍歸於腎臟腎火既安
則真火失黨而胃土又健則水穀之氣更易分消自然
利而瀉止也

此症用滑苓湯亦甚效

滑石茯苓各一兩同研爲末井水調服卽止

人有口乾舌燥面目紅赤易喜易笑者人以爲心火熱
也誰知是心包膻中之火熾甚乎夫心包之火相火
也相火者虛火也膻中爲臣使之官喜樂出焉是膻中

乃心之輔佐代心而行其賞罰者也喜怒者賞罰之所出也心內神明則賞罰正心內拂亂則賞罰移譬如下人專擅借上之賞罰以行其一已之喜怒久則忘其爲下以一已之喜怒爲在下之賞罰矣治法宜瀉心包之火然而瀉心包必至有損於心心虛而心包之氣更虛必至心包之火更盛不如專補其心心氣足而心包之火自安其位何至上炎於口舌面目而成喜笑不節之病乎方用歸脾湯人參三錢茯苓三錢炒棗仁五錢遠志一錢麥冬三錢山藥三錢當歸三錢廣木香末三分

黃芪二錢甘草三分水煎調服一劑面目之紅赤減二劑口舌之乾燥除三劑易喜易笑之症亦平矣此方補心氣之虛仍是補心包之火何以火得之而反息也不知心火宜瀉以爲補而心包之火宜補以爲瀉心包之火旺由於心君之氣衰補其心而心包不敢奪心之權何敢喜笑自若僭我君王哉

此症用參朮二

仁湯亦效

人參茯苓神炒棗仁各三錢白朮五錢
遠志半夏各一錢砂仁二粒水煎服

一鼻中出黑血不止名曰衄衄乃心熱之極火刑肺金也

夫肺金爲心火所尅宜出紅血不宜出黑血矣得母疑爲腎火之刑母乎夫腎爲肺金之子安有子殺其母者然而黑血實腎之色也心火太盛移其熱於肺而肺受火刑必求救於腎腎惡心火之尅母乃出其全力以制心而心已移熱於肺矣腎卽隨火而奔入於肺怒心火之肆惡併力以相戰肺無可藏之地腎卽逐血而出於鼻紅血而變爲黑色真有不共戴天之仇焦頭爛額白日俱昏者矣治法單瀉心中之火不必瀉腎中之水蓋火息而金安金安而腎水何至與心相關哉方用救蟻

丹黃連二錢丹皮三錢茯神二錢麥冬五錢玄參一兩
生棗仁三錢生地三錢柏子仁一錢水煎服連用二劑
黑血卽止四劑不再衄此方制心火之有餘不損心氣
之不足腎見君火之衰肺金之旺則報仇之恨已泄復
國之謀已成自然返兵旋旅何至窮寇之再追哉或謂
心君已爲腎子所蟻則心氣必傷自宜急瀉腎氣毋使
追奔爲是何反瀉心以助其虐耶不知腎水原非有餘
不過因肺母之難故奮不顧身因心火之起爨而轉伐
腎子非理也況方中雖瀉心火而正未嘗少損心氣名

爲瀉心而實補心也不過少解其炎氛以泄腎子之憤而火卽解矣且腎有補而無瀉何若瀉心火之爲得哉

此症用生地冬苓湯

麥冬生地各二兩黃芩三錢水煎服

一人有熱極發斑身中如紅雲一片者人以爲內熱之極而外發於皮膚矣孰知此熱鬱於內而不能外發之故乎此等之病寒熱之藥兩不宜施夫火熱宜用涼藥內火未有不從外泄者但火得寒則又閉微火可以寒解而盛火不可以寒折往往得寒涼之味反遏其外出之機閉塞而不得泄有成爲發狂而不能治者若用熱藥

投之則火以濟火其勢必加酷烈欲不變爲亡陽而不可得矣治法必須和解爲得第火盛者水必衰徒解其火而不益之以水未必火之遽散也宜用補水之中而引其散火之法則火無乾燥之虞而有發越之易也方用風水散斑湯玄參二兩當歸二兩荆芥三錢升麻一錢生地一兩水煎服一劑斑少消二劑斑又消三劑斑全消此方玄參補陰以解其浮遊之火當歸生地以補其心胃之血多用荆芥升麻風藥以解散鬱熱則火得水而相制亦火得風而易揚全無瀉火之品而已獲瀉

火之效實有深義耳

此症用化雲湯亦神

黃連三錢當歸一兩玄參二兩升麻二錢水煎服

一熱極發斑目睛突出兩手冰冷此心火內熱所謂亢則害也而不知又有肝火以助之耳夫熱病宜現熱象何反見寒冷之證乎蓋火極似水耳熱極於心則四肢之血齊來救心轉無血以養手足故手足反寒如冰之冷者外寒之極實由於內熱之極也至於目睛突出者肝開竅於目而目之大眚又心之竅也心火既盛又得木中之火相助則火更添焰而炎上所以直奔其竅而出

但目中之竅細小不足以暢泄其火怒氣觸睛故突而出也治法宜瀉心火而更平肝木木氣既舒心火自散方用風水散斑湯加減而症自愈也玄參一兩當歸一兩黃連三錢荊芥三錢升麻三錢白芍一兩生地五錢水煎服此方加白芍黃連以黃連瀉心火而白芍平肝火也又得荊芥升麻引羣藥共入於腠理之間則上下四旁之餘熱盡消且不至遏抑其火有經絡未達之虞此方補多於攻散火而不耗損真氣庶幾有既濟之美也

此症用玄丹升麻湯亦神效

玄參半斤丹皮三兩升麻三錢水煎一碗一剗飲愈
一熱極不能睡熟日夜兩眼不閉人以爲心腎不交火盛
之故誰知是水火兩衰之故乎夫心火最畏腎水之尅
而又最愛腎水之生蓋火非水不養也腎水又最愛心
火之生而又最惡心火之燒蓋水非火不乾也是心腎
一相愛則相交心腎相惡則相背求閉目而神遊於華胥
一之國自不可得矣治法補其心中之液以下降於腎補
其腎中之精以上滋於心并調其肝氣以相引於心腎
之間俾相惡者仍至相愛則相背者自相交矣方用引

交湯熟地麥冬各一兩炒棗仁山茱萸沙參各五錢茯
神三錢玄參五錢白芍二兩炒梔子三錢菖蒲破故紙
各五分水煎服連服二劑卽目閉而酣睡矣此方心腎
雙補而平其肝氣以清木中之火蓋肝火瀉則心火自
平腎水亦旺勢必心氣通於肝而腎氣亦通於肝也心
腎旣通於肝而又有菖蒲以引心破故紙以引腎介紹
同心自能歡好如初重結寤寐之交矣

此症用水火兩滋湯亦效

熟地三兩肉桂二錢兔絲子一兩水煎服

一人肝火內鬱結而不伸悶煩躁急吐痰黃塊者人以爲

火鬱宜達也然達之而火愈熾此乃未嘗兼肝腎而同治也夫肝木有火火鬱而不宣者雖是外邪蒙之亦因內無水以潤之也木無水潤則木鬱更甚倘徒用風藥以解肝中之火不用潤劑以蔭肝中之水則熬乾肝血而火益盛矣倘徒用潤劑以益其肝中之水不用風劑以舒其肝中之火則拂抑肝氣而鬱更深矣鬱深則煩悶於心火盛則躁急於腹欲其痰涎之化得乎治法舒其肝以解火復補其腎以濟水自然鬱結伸而諸症愈也方用肝腎兩舒湯熟地玄參各一兩茯苓三錢白芍

一兩柴胡一錢當歸五錢甘草炒梔子各一錢丹皮三錢水煎服二劑漸輕四劑全愈此方歸芍柴梔所以舒肝者風以吹之也熟地玄丹所以補腎者雨以漑之也茯苓甘草又調和於二者之中使風雨無太過不及之虞耳譬如夏令炎蒸鬱極而熱樹木枯槁忽得金風習習大雨滂沱則從前鬱悶燔燥之氣盡快如掃而枯槁者條變爲青葱爽氣迎人豈猶有煩悶躁急等症哉

此症用快膈

湯亦效

白芍當歸熟地各一兩柴胡甘草各一錢生地麥冬各三錢枳殼半夏各三錢水煎服

一人頭面紅腫下身自臍以下又現青色口渴殊甚似欲發狂人以爲下寒而上熱也誰知是下熱之極而假現風象以欺人乎若作上熱下寒治之立時發狂而死必至皮肉盡腐也此種之病乃悞聽方士之言服金石之藥以助命門之火強陽善關助樂旦夕而金石之藥必經火煨其性燥烈加之鼓勇浪戰又自動其火戰久則樂極情濃必然大泄其精倍於尋常火極原已耗精復倍泄精以竭其水一而再再而三必有陰虛火動之憂無如世人迷而不悟以秘方爲足恃以殺人之藥爲靈

丹日日吞嚥而不知止則臟府無非火氣雖所用飲食未嘗不多然而火極易消不及生精化水於是火無水制自然上騰頭面其頭面初猶微紅久則純紅而作腫然自臍以下不現紅而現青者以青乃風木之色也臍下之部位屬腎腎火旺而腎水乾則肝木無所養於是肝氣不自安乃下求於腎而腎又作強火熾肝氣欲返於本宮而燥極不能自還遂走腎之部位而外現青色矣此等症候內經亦未嘗言及無怪世人之不識也夫肝氣之逆如此而火愈上升欲口之不渴得乎口渴飲

水止可救胃中之乾燥而不能救五臟之焦枯勢且飲水而口愈渴安得不發狂哉治法必須大補其水而不可大瀉其火蓋瀉其火則火息而水竭亦必死之道也方用救焚解毒湯熟地四兩玄參二兩麥冬三兩白芍二三兩金銀花三兩甘菊花五錢牛膝一兩黃栢一錢水煎服一連數劑下身之青色除再服數劑頭面之紅腫亦漸愈此方減半必再服一月始無癰疽之害蓋熱極發紅乃是至惡之兆況現青色尤爲惡之極者幸臍之上不青若一見青色則臟府腸胃內爛瘡瘍癰毒外生

安有性命哉前古醫聖不論及者以上古之人恬澹冲和未嘗服金石之毒藥也後世人情放蕩覓春藥如飴糖而方士之輩但知逢迎貴介之歡心匠意造方以博裙帶之樂天人天年爲可痛傷也我特傳此方以救之以火之有餘者水之不足故用熟地麥冬以大益其腎水又恐熟地麥冬不足以息燎原之火又益玄參甘菊以平其胃中之炎瀉火仍是滋陰之味則火息而正又無虧火既上行非引而下之則水不濟而火恐上騰加一之牛膝之潤下使火下降而不上升也腎水既久枯竭

所補之水僅可供腎中之自用安得分餘膏而養肝木之子復佐之白芍以滋肝則肝木既平不必取給於腎水自氣還本宮而不至走下而外泄然而火焚既久則火毒將成雖現在之火爲水所尅而從前之火毒安能遽消故又輔之金銀花以消其毒而更能益陰是消火之毒而不消陰之氣也又慮陽火非至陰之味不能消化於無形乃少用黃栢以折之雖黃栢乃大寒之藥然入之大補陰水之中反能解火之毒引補水之藥直入於至陰之中而瀉其虛陽之火耳此方除黃栢不可多

用外其餘諸藥必宜如此多用始能補水之不足瀉火之有餘否則火熾而不可救也夫救焚之道刻不可緩非滂沱大雨不能止其遍野燎原之火況火既升騰胃中得水不啻如甘露之止渴大料煎飲正足以快其所欲不必慮其多而難受也

此症用定狂湯亦神效

熟地三兩知母一兩荊芥五錢水煎服一劑卽愈

一眼目紅腫口舌盡爛咽喉微痛兩脇脹滿人以爲肝火之旺誰知是腎火之旺乎夫眼目屬肝兩脇亦肝之位明是肝火之旺而謂是腎火者何居以咽喉口舌之痛

爛而知之也第口舌屬心咽喉屬肺與腎絕不相干何
統以腎火名之不知腎火龍雷之火也雷火由地而冲
於天腎火亦由下而升於上入於脇則脇脹入於喉則
喉痛入於口舌則口舌爛入於眼目則眼目腫矣火無
定位隨火之所至而病乃生今四處盡病乃腎火之大
熾耳蓋各經之火止流連於一處斷不能口舌咽喉眼
目兩脇一齊受病也似乎治法未可獨治一經矣然而
各經不可分治而腎經實可專治治其腎火而各經之
火盡散也方用六味地黃湯加味治之熟地一兩山藥

五錢茯苓三錢丹皮五錢澤瀉三錢山茱萸四錢麥冬
白芍各一兩水煎服一劑兩脇之脹滿除二劑眼目之
紅腫愈三劑咽喉之痛解四劑口舌之爛痊也六味湯
原是純補真水之藥水足而火自息又有白芍之舒肝
以平木麥冬之養肺以益金金生水而水不必去生肝
則水尤易足而火尤易平也蓋龍雷之火乃虛火也虛
火得水而即伏何必瀉火以激其怒哉或曰用六味之
方而不遵分兩進退加減者何也曰夫藥投其病雖佐
使之味可多用病忌其藥雖君主之品自當少減輕重

少殊又何慮哉

此症用止沸湯亦佳
熱地三兩麥冬二兩地骨皮一兩水煎服

一寒熱時止時發一日四五次以爲常熱來時躁不可當
寒來時顫不能已人以爲寒邪在陰陽之間也誰知是
火熱在心腎之內乎夫腎與心本相尅而相交者也倘
相尅而不相交必至寒熱止發之無定蓋心喜寒而不
喜熱腎喜熱而不喜寒然而熱爲腎之所喜必爲心之
所惡寒爲心之所喜必爲腎之所惡腎惡心寒恐寒氣
犯腎遠避之而不敢交於心心惡腎熱恐熱氣犯心堅

却之而不肯交於腎然而腎惡心寒而又惡其不下交於腎必欲交心而心不受反以熱而凌心矣心惡腎熱而不上交於心必思交腎而腎又不受反以寒而犯腎矣兩相犯而相凌於是因寒熱之盛衰分止發之時候矣夫心腎原無時不交也一日之間寒熱之止發無常因交而發因不交而卽止又何足怪惟熱來時躁不可當寒來時顫不能已實有秘義也夫熱來之時乃腎氣之升騰也心雖惡熱而心中正寒宜不發躁而何以躁蓋寒則心氣大虛虛則惟恐腎氣之來攻乃懼而躁非

熱而躁也寒來之時乃心氣之下降也腎雖惡寒而腎中正熱宜不發顫而何以顫蓋熱則腎水大乏乏則惟恐心氣之來奪乃吝而顫非寒而顫也然則欲心之不躁必須使其不寒欲腎之不顫必須使其不熱方用解圍湯人參五錢熟地一兩山茱萸五錢當歸一兩茯神五錢生棗仁五錢柴胡一錢白芍一兩遠志二錢半夏二錢玄參三錢菖蒲一錢水煎服二劑寒熱減半躁顫亦減半再服二劑前症頓愈再服二劑不再發此方心肝腎三部均治之藥也欲心腎之交必須借重肝木爲

介紹分往來之寒熱止彼此之躁顛方能奏功方中雖止腎熱而散心寒倘肝氣不通何能調劑所以加入柴胡白芍以大舒其肝中之鬱氣蓋祖孫不至間隔而爲子爲父者自然愉快矣寧尚至熱躁寒顛之乖離哉

此症用玄荆湯亦效

玄參二兩荆芥三錢水煎服

一熱極止在心頭上一塊出汗不啻如雨四肢他處又復無汗人以爲心熱之極也誰知是小腸之熱極乎夫小腸在脾胃之下何以火能犯心而出汗乎不知小腸與心爲表裏小腸熱而心亦熱矣然而心中無液取給於

腎水以養心倘汗是心中所出竟同大雨之淋漓則發汗亡陽宜立時而化爲灰燼胡能心神守舍而不發狂哉明是小腸之熱水不下行而上出也第小腸之水便於下行何故不走陰器而反走心前之竅耶正以表裏關切心因小腸而熱小腸卽升水以救心而心無竅可入遂走於心外之毛竅而出也然則治法不必治心仍治小腸利水以分消其火氣則水自歸源而汗亦不從心頭外出也方用返汗化水湯茯苓一兩猪苓三錢劉寄奴三錢水煎服一劑而汗止不必再劑也茯苓猪苓

俱是利水之藥加入劉寄奴則能止汗又善利水其性又甚速同茯苓猪苓從心而直趨於膀胱由陰器以下泄因水去之急而火亦隨水而去急也正不必再泄其火以傷損夫臟腑耳

此症用苓連湯亦神
茯苓二兩黃連一錢水煎服

一口舌紅腫不能言語胃中又覺飢渴之甚人以爲胃火之上升也第胃火不可動一動則其勢炎上而不可止非發汗亡陽必成躁妄發狂矣安能僅紅腫於口舌不能言語之小症乎故此火乃心包之火而非胃火也夫

舌乃心之苗亦心包之竅也若心包無火無非清氣上升則喉舌安閒語言響亮迨心包火動而喉舌無權況心包之火乃相火也相火易於作祟譬如權臣多慾欲立威示權必先從傳遞喉舌之人始今相火妄動而口舌紅腫勢所必至又譬如主人之友三僕輕辱則友亦緘默以求容若不投以貨財則不能得其僕之所求此飢渴之所以來也治法清其心包之火而不必瀉其胃中之土恐瀉胃而土衰則心包之火轉來生胃其火愈旺也方用清火安胃湯麥冬一兩石斛三錢丹參三

錢生地三錢炒棗仁五錢竹葉一百片水煎服一劑語
言出再劑紅腫消三劑而胃中之飢渴亦愈矣此方全
去消心包之火而又不瀉心中之氣心包火息而胃氣
自安矣

此症用玄丹麥冬湯亦效
玄參丹參麥冬各一兩水煎服

一熱症滿身皮竅如刺之鑽又復疼痛於骨節之內外以
冷水拍之少止人以爲火出於皮膚也誰知是火鬱於
臟腑乃欲出而不得出之兆也蓋火性原欲炎上從皮
膚而旁出本非所宜其人內火旣盛而陽氣又旺火欲

外泄而皮膚堅固火本鬱而又拂其意遂鼓其勇往之
氣而外攻其皮膚思奪門而出無如毛竅不可遽開火
不得已仍返於臟腑之內而作痛以涼水拍之而少止
者火喜其水之潤膚而反相忘其水之能尅火矣非因
水之外擊足以散火而能止痛也然則治法亦先瀉其
脾胃之火而餘火不瀉而自瀉也方用攻火湯大黃三
錢石膏五錢炒梔子三錢當歸一兩厚朴一錢甘草一
錢柴胡一錢白芍三錢水煎服一劑火瀉二劑痛除此
方直瀉脾胃之火又不損脾胃之氣兼舒其肝木之鬱

則火尤易消乃扼要爭奇治火實有秘奧何必臚臚而清之臟臟而發之哉

此症用宜揚

散亦佳

柴胡一錢 荊芥二錢 當歸一兩
麥冬一兩 天花粉三錢 水煎服

人有心中火熱如焚自覺火起卽入小腸之經輒欲小便急去遺溺大便隨時而出人以爲心火下行誰知是心與心包二火之作祟乎夫心包之火代君司化君火盛而相火寧君火衰而相火動然亦有君火盛而相火亦動者第君相二火不可齊動齊動而君相不兩立相火

見君火之旺不敢上奪君權乃讓君而下行而君火既動無可發洩心與小腸爲表裏自必移其熱於小腸相火隨輔君火下行既入小腸而更引入大腸矣此二便所以同遺也治法安二火之動而熱焰自消方用四物湯加味治之熟地一兩川芎二錢當歸一兩白芍五錢黃連二錢玄參一兩黃栢一錢車前子二錢水煎服二劑少安四劑全愈四物湯補血之神劑也火動由於血燥補其血而臟府無乾涸之虞涼其血而火焰無浮游之害況黃連入心以清君火黃栢入心包以清相火加

車前利水引二火直走膀胱從水化而盡洩之又何亂經之慮哉

此症用二地

湯亦佳

生地熟地當歸各一兩人參三錢黃連一錢肉桂五分水煎服

人有大怒之後週身百節俱疼胸腹且脹兩目緊閉逆冷手指甲青黑色人以爲陰症傷寒也誰知是火熱之病乎夫陰症似陽陽症似陰最宜分辨此病乃陽症似陰也手指甲現青黑色陰症之外象也逆冷非寒極乎不知內熱之極反見外寒乃似寒而非寒也大怒不解必

傷其肝肝氣甚急肝葉極張一怒而肝之氣更急而肝之葉更張血沸而火起有不可止拂之勢肝主筋火起而筋乃攣束作痛火欲外焚而痰又內結痰火相搏溼氣無可散之路乃走其溼於手足之四末指甲者筋之餘也故現青黑之色手足逆冷而胸腹正大熱也治法平其肝氣散其內熱而外寒之象自散矣方用平肝舒筋湯柴胡一錢白芍一兩牛膝生地丹皮炒梔子各三錢當歸五錢陳皮甘草各二錢神麴五分秦艽烏藥各一錢防風三分水煎服一劑目開二劑痛止三劑脹除

四劑諸症盡愈此方所用之藥俱入肝經以解其怒氣也怒氣解而火自平矣火平而筋舒必至之理也人見此等之症往往信之不深不敢輕用此等之藥遂至殺人以陰陽之難辨也然我更有辨之之法與水探之飲水而不吐者乃陽症飲水而即吐者乃陰症倘飲水不吐即以此方投之何至有悞哉

此症用息怒

湯亦效

白芍三兩柴胡二錢丹皮五錢炒
梔子三錢天花粉三錢水煎服

暑症門

一行役負販馳驅於烈日之下感觸暑氣一時猝倒人以爲中暑也誰知是中暍乎夫暍者熱之謂也暑亦熱也何以分之蓋暑之熱由外而入暍之熱由內而出行役負販者馳驅勞苦內熱欲出而外暑遏抑故一時猝倒是暑在外而熱閉之也倘止治暑而不宣揚內熱之氣則氣閉於內而熱反不散矣治法宜散其內熱而佐之以消暑之味方用救暍丹青蒿五錢茯苓三錢白朮三錢香薷一錢知母一錢乾葛一錢甘草五分水煎服一

劑氣通二劑熱散不必三劑此方用青蒿平胃中之火
又解暑熱之氣故以之爲君香薷解暑乾葛散熱故以
之爲佐又慮內熱之極但散而不寒則火恐炎上故加
知母以涼之用白朮茯苓利腰臍而通膀胱使火熱之
氣俱從下而趨於小腸以盡出也火既下行自然不逆
而上冲而外暑內熱各消化於烏有矣

此症用解暑

散亦效

香薷茯苓各三錢甘草黃連各一錢白朮一兩
白扁豆二錢白豆蔻一粒水煎服一劑卽愈

一膏梁子弟多食瓜果以寒其胃忽感暑氣一時猝倒是

中暑也蓋膏粱之人天稟原弱又加多慾未有不內寒者也復加之瓜果以增其寒涼內寒之極外熱反易於深入陰虛之人暑氣卽乘其虛而入之治法不可祛暑爲先必須補氣爲主然旣因陰虛以至陽邪之中似宜補陰爲主不知陽邪之人脾依陰氣也補陰則陰氣雖旺轉爲陽邪之所喜陽得陰而相合正恐陰弱不能相配若一旦助其陰氣無論陰難却陽而陽邪且久居之而生變矣惟補其陽氣則陽氣健旺益之散暑之味則邪陽不敢與正陽相敵必不戰而自走也方用人參五

錢茯苓五錢白朮五錢香薷二錢白扁豆二錢陳皮五分甘草一錢水煎服一劑氣回二劑暑盡散此方名爲散暑回陽湯方中參苓朮豆俱是健脾補氣之藥以回其陽用香薷一味以散其暑何多少輕重之懸殊乎不知陰虛者脾陰之虛也脾雖屬陰非補陽之藥不能效況陽邪甚盛非多用何以相敵乎倘少少用之恐有收斂難遏之虞卽或取勝暑退而元氣未能驟復與其暑去而後補陽何若於邪旺之日而多用之正旣無虧而邪又去速之爲益哉

此症用加味四

君湯亦效

人參白朮各五錢甘草香薷各一錢
茯苓三錢炮薑三分水煎服二劑愈

一中暑氣不能升降霍亂吐瀉角弓反張寒熱交作心胸
煩悶人以爲暑氣之內熱也誰知是陰陽之拂亂乎人
身陰陽之氣和則邪不能相干苟陰陽不能相交而邪
卽乘其虛而入之矣且邪之入入臟府也助強而不助
弱見陰之強而卽助陰見陽之強而卽助陽夏令之人
多陰虛陽旺邪乘陰虛而入本欺陰之弱也然見陽氣
之旺又助陽而不助陰陰見邪之助陽也又妒陽之旺

而相戰陽又嫌邪之黨陽也欲嫁其邪於陰而陰又不受於是陰陽反亂氣不相通上不能升下不能降霍亂吐瀉拂於中角弓反張困於外陰不交於陽而作寒陽不交於陰而作熱心胸之內竟成戰場之地安得而不煩悶哉然則治法和其陰陽之氣而少佐之以祛暑之劑緩以調之不必驟以折之也方用和合陰陽湯人參一錢白朮二錢茯苓五錢香薷一錢藿香一錢蘇葉一錢厚朴五分陳皮三分枳殼三分砂仁一粒天花粉一錢水煎探冷徐徐服之一劑陰陽和二劑各症愈不必

三劑此方分陰陽之清濁通上下之浮沉調和於拂逆之時實有奇功以其助正而不增火祛邪而不傷氣化有事爲無事也

此症用加減六

君湯亦效

人參茯苓白芍各三錢白朮一兩香薷一錢砂仁一粒陳皮五分半夏一錢水煎服一劑卽平

一中暑熱之氣腹中疼痛欲吐不能欲瀉不得此名爲乾霍亂也夫邪入胃中得吐則邪越於上邪入腹中得瀉則邪趨於下矣邪越於上則邪不入於中邪趨於下則邪不留於內今不吐不瀉則邪不上不下堅居於中焦

譬如賊人反叛雖四境安寧而一時生變喋血於城門橫屍於內地斯時非奮不顧身之將號召忠勇冒矢石而奪門靖難烏能安反側於頃刻定禍患於須臾哉治法急用人參一兩瓜蒂七箇水煎一大碗飲之卽吐而愈矣此方名爲人參瓜蒂散此等之病脉必沉伏不吐則死古人亦知用瓜蒂吐之但不敢加入人參耳蓋此症原因胃氣之虛以致暑邪之入今加大吐則胃必更傷非用人參則不能於吐中而安其胃氣也且胃氣素虛而暑邪壅遏雖用瓜蒂以吐之而氣怯不能上送往

往有欲吐而不肯吐者卽或動吐而吐亦不多則邪何能遽出乎惟用人參至一兩之多則陽氣大旺力能祛邪而上湧況得瓜蒂以助之安得而不大吐哉邪因吐而遽散而正氣又復無傷譬如內亂一定而民安物阜仍是救寧之日何至動四郊之多壘哉

此症用參蘆湯亦佳

人參蘆二兩煎滾湯一碗和之井水一碗少入鹽和勻飲之以鷺翎掃喉引其嘔吐吐出卽安然不吐而能受亦愈也

一中暑熱極發狂登高而呼棄衣而走見水而投人以爲

暑毒之侵誰知胃火之相助乎夫暑熱之入人臟腑也多犯心而不犯胃蓋暑與心俱屬火也胃則心之子也胃見暑邪之犯心卽發其土中之火以相衛胃乃多氣多血之府火不發則已發則其酷烈之威每不可當暑邪畏胃火之強益遁入於心而心又喜寒不喜熱畏暑邪之直入不敢自安胃火怒暑邪之直入於心中而不出乃縱其火以焚燒於心之外心又安禁二火之相逼乎勢必下堂而走心君一出而神無所依於是隨火熾而飛越登高而呼者火騰於上以呼救援也棄衣而走

者憎衣之添熱也見水而投者喜水之尅火也此時心中無津液之養皮膚之外必多汗出亡陽是陰陽兩竭之病至危至急之候苟不大瀉其火則燎原之焰何以撲滅乎方用三聖湯人參三兩石膏三兩玄參三兩水煎數碗灌之一劑狂定二劑神安不可用三劑也另用緩圖湯玄參二兩人參一兩麥冬一兩青蒿一兩水煎服二劑而暑熱兩解矣三聖湯用石膏至三兩用人參玄參各至三兩未免少有霸氣然火熱之極非杯水可息苟不重用則燂乾腎水立成烏燼方中石膏雖多而

人參之分兩與之相同實足以驅駕其白虎之威故但能瀉胃中之火而斷不至傷胃中之氣玄參又能滋潤生水水生而火尤易滅也至於緩圖湯不用石膏者以胃中之火既已大瀉所存者不過餘烟斷焰時起時滅何必再用陰風大雨以洗濯之故又改用麥冬青蒿既益其陰又息其火使細雨綢繆之爲得也或問因暑發狂似宜消暑乃三聖湯但瀉火而不顧暑何以能奏功耶不知暑亦火也瀉火卽瀉暑矣使瀉火之中加入香薷藿香清暑之藥則石膏欲下降而香薷藿香又欲外

散轉足以掣石膏之手反不能直瀉其火矣

此症用三清湯救之亦神

玄參四兩石膏一兩青蒿一兩水煎服一劑卽安

一中暑熱症自必多汗今有大汗如雨一出而不能止者人以爲發汗亡陽必死之症也誰知是發汗亡陰之死症乎夫暑熱傷心汗自外泄然而心中無汗也何以有汗此汗乃生於腎而非生於心也蓋心中之液腎生之也豈心之汗非腎之所出乎雖汗出亡陽乃陽旺而非陰虛但陰不能制陽而陽始旺亦陰不能攝陽而陽始亡顧陰陽原兩相根也陰不能攝陽而陽能戀陰則陽

尚可回於陰之中而無如其陽一出而不返也陰根於陽見陽之出而不留亦且隨之俱出罄其腎中之精盡化爲汗而大泄試思心中之液幾何竟能發如雨之汗乎明是腎之汗而非心之汗也汗既是腎而非心則亡亦是陰而非陽矣然則聽其亡陰而死乎尚有救死之法在方用救亡生陰丹人參二兩熟地四兩山茱萸二兩北五味五錢茯苓神一兩白芍一兩水煎服此方熟地山萸五味子均是填精補水之味茯苓神安其心白芍收其魂人參回其陽此人之所知也陰已外亡非填其精

隨何以灌注涸竭之陰陽已外亾非補其關元何以招其散失之陽山茱萸五味補陰之中仍是收斂之劑陰得補而水生則腎中有本汗得補而液轉則心內無傷又得茯神以安之白芍以收之則陽回陰返自有神捷之機也

此症用人參青

蒿湯亦神

人參二兩生地麥冬各一兩青蒿五錢北五味子一錢水煎服汗止卽生否則無救

一中暑熱極妄見妄言宛如見鬼然人又安靜不生煩躁口不甚渴此是寒極相戰寒引神出有似於狂而非熱

極發狂也夫中暑明是熱症何以熱能變寒而有似狂之症也蓋其人陰氣素虛陽氣又復不旺暑熱之邪乘其陰陽兩衰由肺以入心而心氣不足神卽時越出以遁於腎而腎中陰寒之氣上升則暑自出於心之外流連於肺經之內矣暑邪旣已退出於心外而心君尙恐暑邪之來侵乃依其肝木之母以安神心神入於肝則肝魂不寧乃遊出於軀殼之外因而妄見鬼神而妄言詭異也魂旣外遊而神居魂室反得享其寧靜之福况肝木原無火旺而腎中陰寒之氣相逼心君正藉以杜

暑邪之侵且恃之無恐何生煩躁乎惟是肺氣獨受暑邪火刑金而作渴然腎見肺母之被刑乃陰寒之氣直冲而上以救肺故口雖渴而不甚也然則治法奈何散肺中之暑邪補脾胃之土氣土氣一旺而肺氣亦旺矣肺旺可以敵邪又得散邪之藥自然暑氣難留暑散而魂歸神返必至之勢也方用護金湯麥冬一兩大參三錢百合五錢茯苓三錢紫苑一錢香薷一錢甘草一錢水煎服二劑卽愈此方但補肺脾胃之氣不去救心以益寒不去助腎以瀉火不去補肝以逐神而魂自歸肝

神自返心者以邪有所制何必逐邪之太甚正未大虛何必補正之太多不可因邪居於上而下治正輕於下而重治也

此症用人參麥冬湯亦妙
人參二兩麥冬三兩水煎服

一中暑熱吐血傾盆純是紫黑之色氣喘作脹不能卧倒口渴飲水又復不快人以爲暑熱之極而動血也誰知是腎熱之極而嘔血乎夫明是中暑以動吐血反屬之腎熱者蓋暑火以引動腎火也夫腎中之火龍雷之火也龍雷原伏於地夏月則地下甚寒龍雷不能下藏而

多上泄其怒氣所激而成霹靂之猛火光劃天大雨如
注往往然也人身亦有龍雷之火下伏於腎其氣每與
天之龍雷相應暑氣者亦天之龍雷火也暑熱之極而
龍雷乃從地出非同氣相引之明驗乎人身龍雷之火
不動則暑氣不能相引苟腎水原虧腎火先躍躍欲動
一遇天之龍火同氣相感安得不勃然振興哉既已勃
然振興而兩火相激其勢更烈乃直冲而上挾胃中所
有之血而大吐矣胃血宜紅而色變紫黑者正顯其龍
雷之氣也凡龍雷所劈之處樹木必變紫黑之色所過

臟府何獨不然其所過之胃氣必然大傷氣傷則逆氣
逆則喘胃氣既傷何能遽生新血以養胃乎此胸脇之
所以作脹也胃爲腎之關門關門不閉夜無開闔之權
安能卧哉血吐則液乾液乾則口渴內水不足必索外
水以救焚乃飲之水而不快以龍雷之火乃陰火而非
陽火也治法宜大補其腎中之水以制龍雷之火不可
大瀉其龍雷之火以傷其胃中之氣也方用沛霖膏玄
參二兩人參一兩生地二兩麥冬二兩牛膝五錢荊芥
炒黑三錢水煎服一劑血止二劑喘脹消三劑口亦不

渴四劑全愈愈後仍服六味地黃丸可也此方大補腎
水水足而龍雷之火自歸於腎之宅火既安於腎宅血
自止於胃關何必用黃栢知母以瀉火用香薷藿香以
散暑哉况瀉火而火愈熾必至傷損夫胃土散暑而暑
難退必至消耗夫肺金勢必血不可止火不可滅而死
矣

此症用丹蒿湯亦神

丹皮三兩荆芥三錢青蒿一兩水煎服

一中暑熱之氣兩足冰冷上身火熱煩躁不安飲水則吐
人以爲下寒上熱之症乃暑氣之阻隔陰陽也誰知是

暑散而腎火不能下歸之故乎人身龍雷之火因暑氣相感乃奔騰而上世醫不知治法徒瀉其暑熱之氣不知引火歸源於是暑熱已散龍雷之火下不可歸乃留於上焦而作熱矣火既盡升於上焦則下焦無火安得不兩足如冰耶火在上而寒在下兩相攻擊中焦之地排難解紛兩不相合煩躁不安有自來也上熱薰肺口必渴也飲水止可救上焦之熱及至中焦已非所宜況下焦純寒冷水正其所惡欲不吐得乎治法不可治暑而并不可瀉火不特不可瀉火必須補火蓋龍雷之火

虛火也實火可瀉虛火宜補然而補火之中仍須補水以濟之補水者補腎中之真水也真火非真水不歸真火得真水以相合則下藏腎中不至有再升之患也古用八味地黃湯熟地一兩山茱萸五錢山藥五錢丹皮茯苓澤瀉各三錢肉桂一錢附子一分水煎探冷飲之一劑兩足溫矣再劑上身之火熱盡散中焦之煩躁亦安且不思飲水矣六味地黃湯補水之神藥桂附引火之神丹水火既濟何至陰陽之反背乎

此症用還腎湯亦效

熟地三兩甘草一錢肉桂五分牛膝五錢水煎服

人有夏日自汗兩足逆冷至膝下腹脹滿不省人事人以
爲陽微之厥也誰知是傷暑而溼氣不解乎夫溼從下
受溼感於人身未有不先從下而上故所發之病亦必
先見於下溼病得汗則溼邪可從汗而解矣何自汗而
溼仍不解耶蓋溼病而又感暑氣自汗止可解暑而不
能解溼以暑熱浮於上身而溼邪中於下身汗解於陽
分而不解於陰分耳治法利小便以解溼逐熱邪以解
暑則上下之氣通而溼與暑盡散矣方用解利湯石膏
二錢知母一錢甘草五分半夏一錢白朮三錢猪苓一

錢茯苓三錢澤瀉一錢肉桂一分水煎服連服十劑全愈此方乃五苓散白虎湯之合方也溼因暑病不祛暑則溼不易消故用白虎湯於五苓散中解暑利溼而兼用之也

此症用清暑定

逆湯亦佳

白朮山藥薏仁各五錢肉桂三分香薷一錢陳分三分人參二錢茯苓三錢水煎服

人有冬時寒令偶開箐箱以取綿衣覺有一裹熱氣冲鼻須臾煩渴嘔吐灑灑惡寒翕翕發熱惡食喜水大便欲去不去人皆以爲中惡也誰知是傷暑之病乎夫冬月

有何暑氣之侵人謂之傷暑不知氣虛之人遇邪卽感不必值酷熱炎氛奔走烈日之中而始能傷暑也或坐於高堂或眠於靜室避暑而反得暑者正比比也是暑氣之侵人每不在熱而在寒衣裳被褥晒之盛暑夾熱收藏於笥箱之內其暑氣未發一旦開泄氣盛之人自不能干倘體虛氣弱偶爾感觸正易中傷及至中傷而暑氣必發矣况冬時人身外寒內熱以熱投熱病發必速故聞其氣而卽病也治法不可以傷寒法治之當舍時從症仍治其暑氣而各症自消方用香薷飲加減治

之人參三錢白朮三錢茯苓二錢香薷二錢黃連五分
甘草三分陳皮五分扁豆二錢厚朴五分水煎服一劑
而愈不必再劑若執冬令無傷暑之症拘香薷非治寒
之方不固泥乎甚矣醫道之宜通變而治病之貴審問
也

此症用補氣化

暑丹亦效

人參二錢茯苓白朮麥冬各三錢香薷一錢砂仁
一粒陳皮炮薑神麴各三分水煎服一劑即愈

燥門

一陰耗而思色以降其精則精不出而內敗！便道澀如淋此非小腸之燥乃心液之燥也夫久戰而不泄者相火旺也然而相火之旺由於心火之旺也蓋君火一衰而相火卽上奪其權心火欲固而相火欲動心火欲閉而相火欲開況心君原思色乎毋怪其精之自降矣然心之衰者亦由腎水虛也腎旺者心亦旺以心中之液腎內之精也精足則上交於心而心始能寂然不動卽動而相火代君以行令不敢僭君以奪權故雖久戰而

可以不泄精虛則心無所養怯然於中本不可戰而相火鼓動亦易泄也至於心君無權心甫思色而相火操柄矣久之心君既弱而相火亦不能強有不必交接而精已離宮又不能行河車逆流之法安能復回於故宮哉勢必閉塞溺口水道澁如淋而作痛矣治法必須補心仍須補其腎水少佐以利水之藥則濁精自愈矣方用化精丹熟地二兩人參五錢山茱萸一兩車前子三錢麥冬一兩牛膝五錢白朮一兩生棗仁五錢沙參一兩水煎服一劑而澁痛除二劑而淋亦止矣此方人參

以生心中之液熟地山茱沙參以填腎中之陰麥冬以
益肺金使金之生水則腎陰尤能上滋於心又得生聚
仁之助則心君有權自能下通於腎而腎氣既足自能
行其氣於膀胱又得白朮利腰膺之氣則尤易通達復
得牛膝車前下走以利水則水竅開而精竅自閉何患
小腸之燥澁乎心液非補腎不化精竅非補腎不閉倘
單用利水逐濁之味何能取效哉

此症用生液

丹亦妙

熟地二兩山茱萸人參生棗仁茯神各五
錢北五味二錢丹皮丹參各三錢水煎服

陰已痿弱見色不舉若強勉入房以耗竭其精則大小
便牽痛數至圜而不得便愈便則愈痛愈痛則愈便人
以爲腎火之燥也誰知是腎水之燥乎夫腎中水火兩
不可離人至六十之外水火兩衰原宜閉關不戰以養
其天年斷不可妄動色心以博房幃之趣犯之多有此
病至於中年人患此病者乃縱色竭精以至火隨水流
水去而火亦去一如老人之痿陽不可以戰矣倘能慎
疾而閉關亦可延年無如其色心之不死也奮勇爭鬪
或半途倒戈或入門流涕在腎宮本不多精又加暢泄

則精已涸竭無陰以通大小之腸則大小腸乾燥自然
兩相取給彼此牽痛也上游無泉源之濟則下流有竭
澤之虞下便則上愈燥而痛生下痛則上愈燥而便急
治法必須大補其腎中之水然不可僅補其水而必須
兼補其火蓋水得火而易生也方用潤涸湯熟地二兩
白朮一兩巴戟天一兩水煎服此方用熟地以滋腎中
之真陰巴戟天以補腎中之真陽雖補陽而仍是補陰
之劑則陽生而陰長不至有強陽之害二味補腎內之
水火而不爲之通達於其間則腎氣未必遽入於大小

之腸也加入白朮以利其腰臍之氣則前後二陰無不通達何至有乾燥之苦數圓而不得便哉

此症用天一
湯亦效

地骨皮玄參芡實各五錢山藥牛膝丹
皮各三錢熟地一兩肉桂一錢水煎服

一人有日間口燥舌上無津至夜臥又復潤澤人以爲陽
虛之燥也誰知是陰畏陽火之燥而不交於陽乎夫陽
旺則陰衰陽衰則陰旺口燥之病陰陽兩虛之症也然
夜燥而日不燥乃陰氣之虛日燥而夜不燥乃陽火之
旺夫腎中之水陰水也舌上廉泉之水乃腎水所注腎

水無時不注於廉泉之穴則舌上不致乾枯胡爲陽火
遽至於爍竭哉且腎水一乾則日夜皆當焦涸何能日
燥而夜不燥乎此症蓋陽火甚旺而陰水尙未至大衰
然止可自顧以保其陰不能分潤以濟其陽於是堅守
其陰於下焦不肯上交於陽位自然上焦火熾而口燥
也治法不必瀉陽火之旺惟補其真陰之水則水足以
濟陽矣方用六味地黃湯加麥冬五味治之熟地一兩
山茱萸五錢山藥五錢丹皮澤瀉茯苓各三錢麥冬一
兩五味一錢水煎服連服數劑自愈此方專補腎水加

麥冬五味以補肺肺腎相資則水尤易生陽得陰而化亦陽得陰而平陰既相濟陽又不旺安得口之再燥哉

此症用灌舌丹亦佳

熟地麥冬各一兩沙參地骨皮各五錢水煎服

一人有作意交感盡情浪戰陰精大泄不止其陰翹然不倒精盡繼之以血者人以爲火動之極誰知是水燥之極耶夫腎中水火原兩相根而不可須臾離者也陰陽之氣彼此相吸而不能脫陽欲離陰而陰且下吸陰欲離陽而陽且上吸也惟醉飽行房亂其常度陰陽不能平於是陽離陰而陽脫陰離陽而陰脫兩不相援則陽

之離陰甚速陰之離陽亦速矣及至陰陽兩遺則水火兩絕魂魄且不能自主往往有精脫而死者今精遺而繼之血人尙未死是精盡而血見乃陰脫而陽未脫也使陽已盡脫外勢何能翹然不倒乎救法急須大補其腎中之水俾水生以留陽也然陰脫者必須用陽藥以引陰而強陽不倒倘補其陽則火以濟火必更加燥涸水且不生何能引陽哉不知無陰則陽不得引而無陽則陰亦不能引也法宜用九分之陰藥一分之陽藥大劑煎飲水火無偏勝之虞陰陽有相合之功矣方用引

陰奪命丹熟地八兩人參一兩北五味子三錢沙參二兩肉桂一錢水煎服一劑而血止二劑而陽倒連服四劑始有性命再將前藥減十分之七每日一劑服一月平復如故此方用熟地沙參以大補其腎中之陰用人參以急固其未脫之陽用五味子以斂其耗散之氣用肉桂於純陰之中則引入於孤陽之內令其已離者重合已失者重歸也倘不多用補陰之藥而止重用人參肉桂雖亦能奪命於須臾然而陽旺陰涸止可救絕於一時必不能救燥於五臟亦旦夕之生而已

此症用三仙膏亦神

熟地五兩人參二兩丹皮一兩水煎服

一人有夜不能寐口中無津舌上乾燥或開裂紋或生瘡點人以爲火起於心誰知是燥在於心乎夫心屬火然而心火無水則火爲未濟之火也既濟之火則火安於心宮未濟之火則火鬱於心內火鬱不宣則各臟腑之氣不敢相通而津液愈少不能養心而心益燥矣何能上潤於口舌哉開裂生點必至之勢也治法大補其心中之津則心不燥而口舌自潤然而徒補其津亦未必大潤也蓋心中之液乃腎內之精也腎水上交於心則

成既濟之火補腎以生心烏可緩哉方用心腎兩資湯
人參三錢茯神三錢栢子仁一錢炒棗仁三錢麥冬五
錢北五味一錢熟地一兩丹參二錢沙參三錢山茱萸
三錢芡實三錢山藥三錢菟絲子二錢水煎服連服十
劑夜臥安而口中生津諸症盡愈此方心腎同治補火
而水足以相濟補水而火足以相生故不見焦焚之苦
而反獲優渥之歡也

此症夜清

湯亦效

一 人參麥冬各一兩甘草一錢栢子仁兔絲子各
三錢玄參炒棗仁各五錢黃連三分水煎服

人有咳嗽吐痰不已皮膚不澤少動則喘此燥在於肺也
內經云夏傷於熱秋必病燥咳嗽吐痰皮膚不澤而動
喘皆燥病也議者謂燥症必須補腎腎水乾枯而燥症
乃成然而此燥非因腎之乾枯而來因夏傷於熱以耗
損肺金之氣不必去補腎水但潤脾而肺之燥可解雖
然脾爲肺之母而腎乃肺之子補脾以益肺之氣補腎
而不損肺之氣子母相治而相濟肺氣不更加潤澤乎
方用子母兩濡湯麥冬五錢天冬三錢紫苑一錢甘草
三分蘇葉五分天花粉一錢熟地五錢玄參三錢丹皮

二錢牛膝一錢水煎服一劑氣平二劑嗽輕連服十劑
痰少而喘嗽俱愈此方肺脾腎同治之方也方名子母
兩濡似乎止言脾腎也然而治脾治腎無非治肺也脾
腎濡而肺氣安有獨燥者哉

此症用寧嗽

丹亦佳

麥冬二兩五味子二錢天冬三錢生地一兩桑白皮
二錢款冬花紫苑桔梗各一錢甘草五分牛膝三錢
水煎服

人有兩脇脹滿皮膚如虫之咬乾嘔而不吐酸人以爲肝
氣之逆誰知是肝氣之燥乎夫肝藏血者也肝中有血

則肝潤而氣舒肝中無血則肝燥而氣鬱肝氣既鬱則
伏而不宣必下尅脾胃之土而土之氣不能運何以化
精微以生肺氣乎故傷於中則脹滿嘔吐之症生傷於
外則皮毛拂抑之象見似乎肝氣之逆而實乃肝氣之
燥也肝燥必當潤肝然而肝燥由於腎虧滋肝而不補
腎則肝之燥止可少潤於目前而不能久潤於常久必
大滋乎腎腎濡而肝亦濡也方用水木兩生湯熟地一
兩白芍一兩茯苓三錢柴胡一錢陳皮一錢甘草三分
神麴五分白朮三錢甘菊花二錢枸杞子二錢牛膝三

錢玄參三錢水煎服二劑而肝血生四劑而肝燥解或
謂肝燥而用白芍熟地濡潤之藥自宜建功乃用白朮
茯苓柴胡神麴之類不以燥益燥乎不知過於濡潤反
不能受濡潤之益以脾喜燥也脾燥而不過用濡潤之
藥則脾土健旺自能易受潤澤而化精微否則純於濡
潤未免太濕矣脾先受損安能資益夫肝經以生血而
解燥哉用燥於濕之中正善於治燥耳

此症用濡木

飲亦效

白芍一兩熟地川芎各五錢柴胡香附炒
梔子神麴各五分白豆蔻一粒水煎服

人有口渴善飲時發煩躁喜靜而不喜動見水果則快遇熱湯則憎人以爲胃火之盛也誰知是胃氣之燥乎夫胃本屬土土似喜火而不喜水然而土無水氣則土成焦土何以生物哉況胃中之土陽土也陽土非陰水不養胃中無水斷難化物水衰而物難化故土之望水以解其乾涸者不啻如大旱之望時雨也且人靜則火降人動則火起內火既盛自索外水以相救喜飲水而惡熱湯又何疑乎第燥之勢尙未至於熱然燥之極必至熱之極矣治法解燥須清熱也方用清解湯玄參一兩

生地五錢甘菊花三錢天花粉三錢茯苓三錢麥冬三錢丹參二錢沙參三錢水煎服連服四劑而煩躁除再服四劑口渴亦解再服四劑全愈此方平陽明胃火者居其半平少陰相火者居其半蓋陽明胃火必得相火之助而勢乃烈雖治燥不必瀉火然土燥卽火熾之原先平其相火則胃火失勢而燥尤易解此先發制火乃妙法也

此症用潤土

湯亦效

玄參生地各一兩甘草一錢地
骨皮五錢茯苓三錢水煎服

人有肌肉消瘦四肢如削皮膚飛屑口渴飲水人以爲風消之症誰知是脾燥之病乎蓋脾燥由於肺燥而肺燥由於胃燥也胃燥必至胃熱而胃熱必移其熱於脾脾熱而燥乃成矣夫脾爲濕土本喜燥也何反成風消之症乎脾最懼者肝木也木能尅土肝怒胃火逃竄見胃火之入脾卽挾其風木之氣以相侮脾畏肝木不敢不受其風風火相合安得而不燥乎脾燥而何能外榮是以內外交困而風消之症成方用散消湯治之麥冬一兩玄參二兩柴胡一錢水煎服四劑口渴止八劑皮膚

潤二十劑不再消也此方潤肺而不潤脾何脾消之症能愈以症成於肺故潤肺而脾亦潤也方中加柴胡於二味之中大有深意柴胡最抒肝氣肝抒則肝不尅脾脾氣得養况又瀉其脾肺之火火息而風不揚此脾燥之所以易解而風消不難愈也

此症用丹白生母湯亦效

白芍生地各一兩丹皮五錢知母一錢水煎服

人有目痛之後眼角刺觸羞明喜暗此膽血之乾燥也夫膽屬木木中有汁是木必得水而後養也膽之系通於目故膽病而目亦病矣然而膽之系通於目不若肝之

竅開於目也目無血而燥宜是肝之病而非膽之病然
而肝膽爲表裏肝燥而膽亦燥矣膽與肝皆主藏而不
瀉膽汁藏而目明膽汁瀉而目暗蓋膽中之汁卽膽內
之血也血少則汁少汁少卽不能養膽養目矣治法不
可徒治其目也亟宜滋膽中之汁尤不可止治其膽更
宜潤肝中之血而膽之汁自潤目之火自解矣方用四
物湯加味治之熟地一兩川芎一錢當歸三錢白芍一
兩柴胡一錢甘菊花三錢白蒺藜一錢五分水煎服連
服四劑而目痛之疾自除再服四劑而羞明喜暗之病

去四物湯補血補肝中之血也補肝而膽在其中矣且四物湯尤入心腎心得之而濡不來助膽之火腎得之而澤不來盜膽之氣心肝腎全無乾燥之虞而膽豈獨燥乎所以服之而奏功也

此症用甘風丹荆湯亦效

丹皮一兩防風五分荆芥五分甘菊花五錢水煎服
人有雙目不痛瞳神日加緊小口乾舌苦人以爲心火之旺也誰知是心包之乾燥乎夫目之系通於五臟不止心包之一經也瞳神之光心腎之光也心腎之光心腎之精也然而心之精必得腎之精交於心包而後心腎

之精始得上交於目蓋心君無爲而心包有爲也所以
心包屬火全恃腎水之滋益腎不交於心包卽心包不
交於心火無水濟則心包無非火氣乾燥之極何能內
潤心而外潤目乎然則瞳神之緊小皆心包之無水由
於腎水之乾枯也補腎以滋心包烏可緩哉方用救瞳
湯熟地一兩山茱萸五錢甘菊花三錢玄參一兩柴胡
五分白芍一兩當歸五錢山藥三錢丹皮五錢水煎服
此方乃肝腎同治之法也心包無水不治心包而滋肝
腎者以肝乃心包之母也肝取給於外家以大益其子

舍勢甚便而理甚順緊急之形不化爲寬大之象哉

此症用菊女飲亦效

女貞子一兩甘菊花五錢麥冬五錢水煎服

人有秋後閉結不能大便此燥傷肺金而大腸亦燥非大腸之火也蓋肺與大腸相爲表裏肺燥而大腸不能獨潤且大腸之能開能闔者腎氣主之也腎足而大腸有津腎涸而大腸無澤是大腸之不燥全藉乎腎水之相資也然腎水不能自生肺金乃腎之母肺潤則易於生水肺衰則難於生水腎水無源救腎不暇何能顧大腸哉治法惟補肺腎而大腸自潤矣方用六味地黃湯加

味治之熟地一兩山藥三錢山茱萸四錢茯苓三錢丹
皮三錢澤瀉三錢麥冬一兩北五味一錢水煎服連服
四劑自通切戒用大黃芒硝以開結也蓋此病本傷陰
之症又加劫陰之藥重傷其陰必成爲陽結之症使腹
中作痛百計導之而不得出不更可危哉何若大補其
肺腎之陰使陰足而陽自化之爲得耶

此症用冬歸湯亦效
麥冬當歸各二兩水煎服

人有夏秋之間小便不通點滴不出人以爲膀胱之熱結
誰知是肺燥而膀胱亦燥乎夫膀胱之能通者由於腎

氣之足亦由於肺氣之足也膀胱與腎爲表裏而肺爲水道之上游二經足而水有源流二經虛而水多阻滯况乾燥之至旣虧清肅之行復少化生之氣膀胱之中純是乾枯之象從何處以導其細流哉此小便之不通實無水之可化也治法不可徒潤膀胱而亟當潤肺尤不可徒潤夫肺尤當大補夫腎腎水足而膀胱自然滂沛何虞於燥結哉方用啟結生陰湯熟地一兩山茱萸五錢車前子三錢薏仁五錢麥冬五錢益智仁一錢肉桂一分沙參三錢山藥四錢水煎服此方補腎而仍補

肺者滋其生水之源也補中而仍用通法者水得補而無停滯之苦則水通而益收補之利也加益智以防其遺加肉桂以引其路滂沛之水自然直趨膀胱燥者不燥而閉者不閉矣

此症用栢桂生麥湯亦效

麥冬一兩黃栢三錢生地五錢肉桂三分水煎服

人有消渴飲水時而渴甚時而渴輕人以爲心腎二火之沸騰誰知是三焦之氣燥乎夫消症有上中下之分其實皆三焦之火熾也下焦火動而上中二焦之火翕然相從故爾渴甚迨下焦火息而中上二焦之火浮遊不

定故又時而渴經三焦同是一火何悉聽於下焦之令
蓋下焦之火一發而不可遏故下焦之火宜靜而不宜
動又易動而難靜也必得腎中之水以相制腎旺而水
靜腎虛而水動矣天下安有腎足之人哉腎水虛而取
資於水者又多也水虧奚能制火乎火動必爍乾三焦
之氣則三焦更燥勢必仰望於外水之相救以迅止其
大渴也欲解三焦之渴舍補腎水何法哉方用六味地
黃湯加味治之熟地二兩山茱萸一兩茯苓五錢山藥
五錢丹皮一兩澤瀉五錢麥冬一兩北五味子二錢水

煎服十劑渴輕二十劑渴解三十劑全愈六味治腎更
加麥冬五味以治肺者非止清肺金之火也蓋補肺以
助腎水之源肺旺而腎更有生氣矣腎水旺足以制下
焦之火下焦之火不動而上中二焦之火烏能興焰哉

此症用二丹湯亦妙

丹皮丹參玄參各五錢茯苓栢子仁各三錢水煎服
人有大病之後小腸細小不能出溺脹甚欲死人以爲小
腸之火誰知是小腸之乾燥哉夫小腸之開闔非小腸
主之也半由於膀胱半由於腎氣故小腸之結全在膀
胱之閉而膀胱之閉又成於腎氣之閉也蓋腎水竭而

膀胱枯故小腸亦燥而成結耳治法必須大補腎中之水而補水又必補肺金之氣以膀胱之氣化必得肺金清肅之令以行之也肺氣旺而水流而後助之利水之藥則腎氣開而小腸亦開也方用治本消水湯熟地二兩山茱萸一兩麥冬一兩車前子五錢五味子二錢茯苓五錢牛膝三錢劉寄奴三錢水煎服一劑水通再劑腸寬小便如注矣此方不治小腸專治肺腎肺腎不燥小腸之燥自潤矣

此症用廣澤湯亦效

麥冬二兩生地一兩車前子劉寄奴各三錢水煎服

痿證門

人有胃火薰蒸日冲肺金遂至痿弱不能起立欲嗽不能欲咳不敢及至咳嗽又連聲不止肺中大痛非肺癰之毒乃肺痿之病也夫肺之成痿也由於陽明之火上冲於肺而肺經津液衰少不能滅陽明之焰金從火化累年積歲肺葉之間釀成火宅而清涼之藥不能直入於肺非杆格清涼之故也肺既大熱何能下生腎水水乾無以濟火則陽明之炎蒸更甚自然求救於水穀而水穀因肺金清肅之令不行不能化成津液以上輸於肺

則肺之燥益甚肺燥而肺中津液盡變爲涎沫濁唾矣
肺液旣乾肺氣自怯所成涎沫濁唾若難推送而出此
欲嗽之所以不能也然而涎沫濁唾終非養肺之物必
須吐出爲快無奈其盤踞於火宅倘一咳而火必沸騰
胸膈之間必至動痛此欲咳之所以不敢也迨忍之又
忍至不可忍而咳嗽涎沫濁唾雖出而火無水養上冲
於咽喉不肯遽下此咳嗽所以又連聲而不止也咳嗽
至連聲不止安得不傷損乾燥之肺而作痛乎人見其
痿弱不能起立或用治痿之藥愈傷肺氣奚能起痿治

法宜瀉其胃中之火大補其肺經之氣然又不可徒補其肺中之氣更宜兼補其腎中之水方用生津起痿湯麥冬一兩甘草二錢玄參一兩甘菊花五錢熟地一兩天門冬三錢天花粉一錢貝母一錢金銀花五錢水煎服連服四劑而咳嗽輕再服四劑而咳嗽止再服十劑而痿症除矣蓋陽明之火本可用大寒之藥然而陽明初起之火可用大寒而陽明久旺之火宜用微寒因陽明之火乃胃土中之火初起可用大寒瀉火以救腎中之水久旺用微寒散火所以生胃中之土也胃火之盛

胃土之衰也扶其土卽所以瀉其火而胃土自健自能
升騰胃氣化水穀之精微輸津液於肺中也又加之二
冬甘草天貝之類原能益肺消痰則肺中更加潤澤得
金銀花同入以消除其敗濁之毒則肺金何至再燥乎
加熟地者以填補腎水水旺而肺不必去顧腎子之涸
則肺氣更安清肅下行於各府水生火息不必治痿而
痿自愈也

此症用紫花

飲亦神

麥冬三兩桔梗甘菊花蒲公英各五錢生甘草
貝母各二錢生地一兩紫花地丁三錢水煎服

一胃火上冲於心心中煩悶怔忡驚悸久則成痿兩足無力不能動履此總屬胃火之盛非心火之旺也夫胃屬土而心屬火心乃生胃而胃不宜尅心然心火生胃則心火不炎胃火薰心則心火大燥此害生於恩也倘徒瀉心火則胃子見心母之寒益肆其炎氛愈添心中之燥必下取於腎水而腎因胃火之盛熬乾腎水不能上濟於心火益旺而水益枯骨中無髓安得兩足之生力乎治法宜大益其腎中之水少清其胃中之火則胃氣安而腎水生自然上交於心也方用清胃生髓丹玄參

一兩麥冬五錢甘菊花五錢熟地二兩北五味二錢沙
參五錢水煎服十劑即可行步二十劑怔忡驚悸之病
除又十劑煩悶痿弱之症去再服十劑全愈痿症無不
成於陽明之火然用大寒之藥如石膏知母之類雖瀉
胃火甚速然而多用必至傷胃胃傷而脾亦傷脾傷而
腎安得不傷乎故不若用玄參甘菊之類既清其胃火
而又不損其胃土則胃氣自生能生津液下必注於腎
而上且灌於心矣况麥冬五味以益心熟地沙參以滋
腎上下相資水火既濟痿病豈不愈乎

此症用石斛玄參湯亦佳

金釵石斛一兩玄參二錢水煎服

一陽明之火固結於脾而不肯解善用肥甘之物食後卽
饑少不飲食便覺頭紅面熱兩足乏力不能行走人以
爲陽明胃火之旺以致成痿誰知是太陰脾火之盛以
燥乾其陰乎夫痿症皆責之陽明何以太陰火旺亦能
成痿蓋太陰與陽明爲表裏陽明火旺而太陰之火亦
旺矣二火相合而搏結於腑臟之間所用飲食僅足以
供火之消磨而不能佐水之浸渥火旺水虧則腎宮乾
涸何能充足於骨中之髓耶骨旣無髓則骨空無力何

能起立以步履哉治法益太陰之陰水以勝其陽明之陽火則脾胃之中水火無亢炎之害而後筋骨之內髓血有盈滿之機也方用調脾湯人參五錢玄參一兩麥冬五錢甘菊花五錢薏仁五錢金釵石斛三錢芡實一兩山藥五錢水煎服連服四劑便覺腹不甚饑再服四劑火覺少息再服十劑全愈此方補脾胃之土卽所以補其火也然而火之所以旺者正坐於土之衰耳土衰則不生水而生火矣今於補土之中加入玄參甘菊石斛微寒之藥則脾胃之火自衰而脾胃之土自旺脾胃

之土既旺而脾胃之津自生於是灌注於五臟之間轉
輸於兩足之內火下溫而不上發頭面無紅熱之侵何
至脛趾之乏力哉或曰火盛易消以至善饑似宜用消
導之劑以損脾胃之氣乃不損其有餘而反增益其不
足恐未可爲訓也不知脾胃之土俱不可傷傷土而火
愈旺矣補陰則陽伏消食則傷陰補陰可也寧必用消
導之藥哉

此症用玄母菊英湯亦效

玄參二兩甘菊花一兩知母三錢熟地二兩水煎服
一大怒之後兩脇脹滿胸間兩旁時常作痛遂至飯食不

思口渴索飲久則兩腿痠痛後則遍身亦痛或痛在兩
臂之間或痛在十指之際痛來時可臥而不可行足腠
筋麻不可行動人以爲痰火之作祟也誰知是肝經之
痠症乎夫肝經之痠陽明之火助之也當其大怒時損
傷肝氣則肝木必燥木中之火無以自存必來尅脾胃
之土脾陰不受而胃獨受之胃初自強不服其尅兩相
戰尅而胸脇所以作痛後則胃土不敵肝木之旺乃畏
之而不敢鬪亦歸附於肝久之而飲食少用則不化津
液以生腎水腎無水以養肝而肝氣無非火氣胃亦出

其火以增肝火之焰肝火之性動遂往來於經絡之內而作痛倘更加色慾則精泄之後無水制火自然足軟筋麻呻吟於臥榻之上而不可行動也治法必須平肝而併瀉陽明之火惟是陽明久爲肝木之尅則陽明之火經必虛若再加瀉火胃氣烏能不傷必須瀉陽明之火而不損陽明之氣爲得也方用伐木湯炒梔子三錢白芍一兩當歸五錢甘菊花五錢女貞子五錢地骨皮三錢丹皮三錢青黛三錢金釵石斛三錢水煎服連服四劑而諸痛除再服四劑口思飲食再服十劑全愈此方

瀉肝火以平肝氣然而陽明胃火未嘗不同治之胃氣不傷而胃火自息飲食進而津液生腎水足而骨髓裕不須止痛而痛自失毋煩治痿而痿自起矣

此症用二石

湯亦佳

白芍一兩熟地三兩金釵石斛
牛膝各五錢石膏三錢水煎服

一素常貪色加之行役勞瘁傷骨動火復又行房鼓勇大戰遂至兩足痿弱立則腿顫行則膝痛臥床不起然頗能健飯易消人以爲食消之症也誰知是腎火之盛引動胃火以成腎痿乎蓋胃爲腎之關胃之開闔腎司之

也腎火直冲於胃而胃之關門曷敢阻之且同羣助勢以聽腎火之上炎矣况腎火乃龍雷之火也胃中之火其性亦喜炎上二火相因而起銷鑠腎水有立盡之勢幸腎火盛而胃火尙未大旺故但助腎以消食不至發汗以亡陽且飲食易消猶有水穀以養其陰雖不能充滿於骨中亦可以少滋於腎內故但成痿而不至於死亡也治法急宜大補腎水以制陽光方用起痿降火湯熟地三兩山茱萸一兩薏仁五錢金釵石斛五錢牛膝五錢水煎服四劑腿顫足痛之病去十劑可以步履飲

食不至易饑二十劑全愈此方大補腎陰全不去瀉胃中之火譬如城內糧足則士馬飽騰安敢有鼓噪之聲而興攘奪爭取之患乎

此症用充髓

湯亦妙

熟地三兩玄參二兩金釵石斛牛膝各五錢女貞子五錢水煎服

一煩躁口渴面紅耳熱時索飲食飲後仍渴食後仍饑兩足乏力不能起立吐痰甚多人以爲陽明之實火也誰知是陽明之虛火乎夫陽明屬陽火亦宜實何以虛名之不知胃火初起爲實而久旺爲虛當胃火之初起也

口必大渴身必大汗甚則發狂登高而呼棄衣而走其勢甚急所謂燎原之火也非實而何至於旺極必衰時起時滅口渴不甚汗出不多雖讖語而無罵詈之聲雖煩悶而無躁擾之動得水而渴除得食而饑止此乃零星之餘火也非虛而何實火不瀉必至熬乾腎水有亡陽之變虛火不清則銷燬骨髓有亡陰之禍陰既亡矣安得不成痿乎故治痿之法必須清胃火而加之生津生液之味自然陰長而陽消也方用散餘湯生地一兩玄參一兩茯苓三錢竹葉一百片麥冬一兩人參三錢

麥芽一錢 天花粉二錢 神麴一錢 水煎服 二劑 陽明之
餘火息 再服 二劑 煩躁饑渴之病除 更用 十劑 痿症全
愈 此方散胃火之餘氛 不去損胃土之生氣 胃氣一生
而津液自潤 自能灌注腎經 分養骨髓矣 倘用大寒之
藥 直瀉其胃火 則胃土勢不能支 必致生意索然 元氣
之復反需歲月矣 譬如大亂之後 巨魁大盜已罄掠城
中所有而去 所存者不過餘黨未散耳 用一文臣招撫
之 有餘 若仍用大兵搜索勦除 則雞犬不留 玉石俱焚
惟空城獨存 招徠生聚 有數十年而不可復者矣 何若

勦撫兼施之爲得哉

此症用潤胃

湯亦效

人參五錢麥冬二兩天花粉三錢玄參一兩丹參
一兩甘草一錢山查二十粒神麴二錢水煎服

人有好酒久坐腰痛漸次痛及右腹又及右脚又延及右
手不能行動已而齒痛人以爲賊風之侵體也誰知是
痿症乎或謂痿不宜痛今腹脚手齒俱痛恐非痿也嗟
乎諸痿皆起於肺熱人善飲則肺必熱矣經曰治痿必
取陽明陽明者胃也胃主四肢豈獨脚耶夫痿雖熱病
而熱中有濕不可不察痿病兼濕重者必筋緩而軟痿

病兼熱多者必筋急而痛是痿症未嘗無痛也苟不祛濕以清火而反助濕以動熱則痿症不能痊轉增添其痛矣治法專治陽明以生胃氣佐之瀉火利濕之品則諸痛自消方用釋痛湯人參三錢黃芪三錢白朮五錢茯苓三錢生地五錢麥冬五錢當歸三錢玄參一兩甘草三分水煎服連服四劑而病除此方皆入陽明之藥也入陽明以平胃氣卽入陽明以平胃火宜痿症之頓起矣况茯苓白朮善能去濕復是生胃之品是治濕又治陽明也藥投病之所喜安得而不速愈哉

此症用解醒

飲亦佳

乾葛白朮人參石膏各三錢麥冬

三兩茯苓五錢半夏一錢水煎服

人有肥胖好飲素性畏熱一旦得病自汗如雨四肢俱痿
且復惡寒小便短赤大便或溏或結飲食亦減人以爲
感中風邪也誰知是痿病之已成乎夫痿有五皆起於
肺熱好飲之人未有不熱傷肺者也肺之母爲胃欲救
熱傷之肺必須速救胃土經曰治痿獨取陽明正言其
救胃也胃土不足而肺金受傷則金失所養而不能下
生腎水水乾則火盛而肺金益傷矣況胃主四肢肺主

皮毛今病四肢不舉非胃土之衰乎自汗如雨非肺金之匱乎明是子母兩病不急救胃何能生肺以生腎水哉方用滋潤湯玄參一兩麥冬一兩茯苓三錢芡實五錢人參三錢甘菊花三錢女貞子三錢生地二錢天門冬三錢黃芩一錢天花粉一錢水煎服十劑胃氣生二十劑肺熱解三十劑痿廢起四十劑全愈此方獨取陽明以補胃土兼清肺經之熱也不必去補腎而腎水自潤矣李東垣立有清燥湯亦可治痿不若此方之更神耳

此症用柞木化

醞湯亦效

玄參麥冬各二兩柞木枝三錢甘草五分人參一兩
天冬三錢黃芩貝母各二錢水煎服

消渴門

一消渴之病有氣喘痰嗽面紅虛浮口舌腐爛咽喉腫痛
得水則解每日飲水約得一斗人以爲上消之病也誰
知是肺消之症乎夫肺屬金金宜清肅何火熾如此蓋
心火刑之也肺爲心火所刑則肺金乾燥又因腎水之
虛欲下顧腎肺氣旣燥肺中津液自顧不遑安得餘津
以下潤夫腎乎肺旣無內水以潤腎乃索外水以濟之
然救其本宮之火炎而終不能益腎中之真水腎又不
受外水而與膀胱爲表裏卽將外水傳於膀胱故飲水

而卽洩也治法似宜瀉心中之火以救肺金之熱矣然而肺因火熱發渴日飲外水則水停心下者有之水日侵心則心火留於肺而不歸心中已成虛寒之窟是寒涼之藥反爲心之所惡且寒涼之藥不能上存勢必下趨於脾胃夫肺火之盛而不解者正苦於脾胃之虛土不能生金之故苟再用寒涼必至損傷脾胃之氣肺金何以養哉必須仍治肺金少加補土之味則土旺而肺氣自生清肅之令行而口渴自止方用清上止消丹麥冬二兩天冬一兩人參三錢生地五錢茯苓五錢金銀

花一兩水煎服十劑渴盡減二十劑全愈此方重治肺而輕治胃與脾治肺而不損金清火而不傷土土生金而金生水又何疑乎惟方中加入金銀花者火刑金而多飲凉水則寒熱相擊熱雖暫解於片刻而毒必留積於平時用清金之藥以解其熱不能解其毒也與其日後毒發而用散毒之品何若乘解熱之時卽兼解其毒先杜其患哉况金銀花不特解毒且善滋陰一味而兩用之也

此症用二冬苓車湯亦效

麥冬三兩天冬一兩茯苓五錢車前子三錢水煎服

一消渴之病大渴恣飲一飲數十碗始覺胃中少快否則胸中嘈雜如虫上鑽易於饑餓得食渴減不食渴尤甚人以爲中消之病也誰知是胃消之病乎胃消之病大約成於膏粱之人者居多燔熬烹炙之物肥甘醇厚之味過於貪饕釀成內熱津液乾涸不得不求濟於外水水入胃中不能游溢精氣上輸於肺而肺又因胃火之熾不能通調水道於是合內外之水建瓶而下飲一洩二不但外水難化且平日素醞水精竭絕而盡輸於下較暴注暴泄爲尤甚此竭澤之火不盡不止也使腎水

未虧尙可制火無如膏粱之人腎水未有不素乏者也
保火之不爍乾足矣安望腎水之救援乎內水旣不可
制勢必求外水之相濟而外水又不可以濟也於是思
食以濟之食入胃中止可解火於須臾終不能生水於
旦夕不得不仍求水以救渴矣治法宜少瀉其胃中之
火而大補其腎中之水腎水生而胃火息腎有水而關
門不開胃火何從而沸騰哉方用閉關止渴湯石膏五
錢玄參二兩麥冬二兩熟地二兩青蒿五錢水煎服二
劑而渴減四劑而食減十劑消渴盡除二十劑全愈此

方少用石膏青蒿以止胃火多用玄參熟地以填腎水
重用麥門冬以益肺氣未嘗閉胃之關門也然而胃火
之開由於腎水之開腎水之開由於腎火之動也而腎
火之動又由於腎水之乏也今補其腎水則水旺而腎
火無飛動之機火靜而腎水無沸騰之患腎水既安守
於腎宅而胃火何能獨開於胃關哉此不開之閉真神
於閉也

此症用止消

湯亦效

石膏人參茯神各五錢玄參一兩生地二兩
知母麥芽穀芽神麴各三錢水煎服

一消渴之症小便甚多飲一斗溲一斗口吐清痰投之水
中立時散開化爲清水面熱唇紅口舌不峭人以爲下
消之病也誰知是腎水泛上作消乎夫腎水泛上水升
於咽喉口舌之間宜乎不渴何以渴之甚也蓋下寒之
極逼其火於上焦故作渴耳此火乃腎中之火卽龍雷
之火也一發而不可制宜引而不宜逐可於水中引之
論此等消渴仲景張夫子腎氣丸最妙世傳腎氣丸乃
張夫子定之以治漢帝之消渴者也然而腎氣丸止可
治消渴已痊之症不能治消渴初起之症也當年漢帝

乍患下消之時張夫子實別有神方未傳於世今獨傳

於

鐸鐸

何敢隱秘而不出以救萬世平方用引龍湯

參三兩肉桂三錢山茱萸四錢北五味一錢麥冬一兩
水煎服一劑渴減半三劑全愈龍火浮遊乾燥之極非
玄參三兩斷不能止其焰非肉桂三錢必不能導其歸
山茱萸北五味非用之以益精實取之以止渴益之麥
冬者以龍火久居於上游未免損肺得麥冬以生其氣
則肺金生水火得水而易歸也或謂多用玄參是欲止
焰矣既恐少用不足以止之何多用肉桂以增焰乎蓋

用肉桂者正引火歸源也引火而少用肉桂又何不可
不知玄參善消浮遊之火但其性太涼非多用肉桂則
不足以制其寒制其寒則寒變爲溫而又非大熱正龍
雷之所喜也蓋龍雷之性惡大寒而又惡大熱大寒則
愈激其怒而火上炎大熱則愈助其橫而火上熾今用
肉桂三錢入於玄參三兩之中則寒居其九熱居其一
調和於水火之中又有山茱五味麥冬之助正不見其
熱惟見其溫也龍雷喜溫所以隨之直歸於腎臟火歸
於腎命門不寒蒸動腎水下溫而上熱自除此方較腎

氣化治下消之症效更神速

鐸

不惜傳方又聞揚其義

以見鐸之論症非無本之學也

此症用丹桂止

氣湯亦效

熟地三兩肉桂二錢茯苓丹

皮各一兩麥冬二兩水煎服

一消渴之症口乾舌燥吐痰如蠟涎白沫氣喘不能臥但不甚大渴渴時必須飲水然既飲之後即化為白沫人亦以為下消之病也誰知是腎火上沸之消症乎夫腎中有火乃水中之火也火生水中亦火藏於水內火無水不養亦無水不藏明是水之制火也然而水之不足

必至火之有餘而火反勝水火欺水之不能相制於是
越出於腎宮上騰於咽喉口齒之間火與水原不能離
者也火既上升水必隨之而上升矣水卽不欲上升釜
底火燃安得不騰沸哉惟是水涸以致沸騰而烈火日
炊自成焦釜不以外水濟之得乎然焦釜而沃之以水
仍沸騰而上故吐如蠍之涎沫耳治法不必瀉火而純
補其水使陰精之寒自足以制陽光之熱也方用寧沸
湯麥冬三兩山茱萸三兩茯苓一兩水煎服一劑渴少
止再劑渴又止飲半月全愈此方用山茱萸二兩以大

補腎水盡人知之更加入麥冬三兩者豈滋陰以生腎乎不知久渴之後日吐白沫則熬乾肺液使但補腎水火雖得水而下降而肺中乾燥無津能保肺之不告急于肺癰肺痿之成未必不始於此故補其腎而隨滋其肺不特子母相生且防禍患於未形者也加入茯苓者因飲水過多膀胱之間必有積水今驟用麥冬山萸至六兩之多不分消之於下則必因補而留滯得茯苓利水之藥以疏通之則補陰而無膩隔之憂水下趨而火不上沸水火既濟消渴自除矣

此症用解沫

散亦神

熟地二兩麥冬二兩山萸丹皮
各一兩車前子五錢水煎服

人有素健飲啖忽得消渴疾日飲水數斗食倍而溺數服
消渴藥益甚人以爲虫消也誰知是脾氣之虛熱乎夫
消渴之症皆脾壞而腎敗脾壞則土不勝水腎敗則水
難敵火二者相合而病成倘脾又不壞腎又不敗宜無
消渴之症矣不宜消渴而消渴者必脾有熱乘之得之
飲啖酒果而致之者也夫酒能生熱熱甚則饑非飽餐
則不能解其饑然多食則愈動其火矣火盛水不能

相濟飲水既多不得不多溺也此似消渴而

渴之

症治法平脾中之虛熱佐之解酒消果之味則火毒散而消渴之病自除方用蜜香散木蜜三錢麝香三分酒爲丸更用黃連一錢茯苓三錢陳皮五分神麴一錢人參三錢煎湯送丸藥日用三丸丸盡而愈此丸用麝香者取麝能散酒也且麝香最剋瓜果瓜果聞麝香之氣卽不結子非明驗耶木蜜乃枳枸也釀酒之房苟留木蜜酒化爲水故合用二味以專消酒果之毒也酒果之毒旣消用參苓連曲之類以平脾中之虛熱則腹中清

涼何消渴之有哉

此症用消飲

散亦佳

入參天花粉茯苓各三錢枳殼厚朴各一錢
山查二十粒麥冬二兩甘草一錢水煎服

辨證錄卷之六終